

UDHËZIM
Nr.19, datë 31.5.2011

PËR DETAJIMIN E BUXHETIT TË INSTITUCIONEVE PUBLIKE TË ARSIMIT TË LARTË NË PROGRAMIN “PËR KËRKIM FONDAMENTAL DHE EKSELENCË”

Në mbështetje të nenit 102 të Kushtetutës, si dhe në zbatim të ligjit nr.9936, datë 26.6.2008 “Për menaxhimin e sistemit buxhetor në Republikën e Shqipërisë”, të ligjit nr.7893, datë 22.12.1994 “Për shkencën dhe zhvillimin teknologjik”, të ndryshuar, të ligjit nr.10 355, datë 2.12.2010 “Për buxhetin e vitit 2011”, si dhe të nenit 71 të ligjit nr.9741, datë 21.5.2007 “Për arsimin e lartë në Republikën e Shqipërisë”, të ndryshuar,

UDHËZOJ:

1. Shpërndarja e burimeve financiare në programin buxhetor “Për kërkim fundamental dhe ekselencë”, dhe përdorimi i tyre të bëhen në përputhje me rregullat dhe standardet e programimit buxhetor dhe menaxhimin financiar publik.

2. Institucionet publike të arsimit të lartë, nëpërmjet organeve drejtuese dhe administruese, në përputhje me funksionet e tyre, të përcaktuara në ligjin nr.9741, datë 21.5.2007 “Për arsimin e lartë në Republikën e Shqipërisë”, të ndryshuar, detajojnë dhe miratojnë buxhetin “Për kërkim fundamental dhe ekselencë”, sipas fakulteteve, instituteve, departamenteve, qendrave kërkimore dhe njësisve të tjera të njëvlershme me to.

3. Fondet e miratuara nga në programin buxhetor 09770, artikulli 602, kapitulli 01, në artikullin 602-606 “Për kërkim fundamental dhe ekselencë”, detajohen për çdo IAL dhe fakultet/institut, sipas tabelës nr.1 bashkëlidhur udhëzimit, mbështetur në kriteret e mëposhtme:

a) Numri total fizik i personelit akademik me kohë të plotë për çdo fakultet, pavarësisht nga titujt;

b) Koeficientët e konvertimit sipas fushave të shkencës:

i) shkencat teknike, natyrore, biologjike 1,0;

ii) shkencat shoqërore 0,2;

iii) fushat e artit dhe sportit 0,5;

iv) për Qendrën e Studimeve Albanologjike është përdorur koeficienti favorizues 2,0, sepse: i) ka mision kryesor kërkimin; ii) nuk ka të ardhura të tjera; dhe iii) ka vetëm pak studentë të masterit dhe doktoratës.

c) Numri i personelit akademik i konvertuar për çdo fakultet ($c=a*b$);

d) Fondi total që shpërndahet;

e) Fondi që i takon për çdo punonjës akademik i konvertuar ($e=d/c$);

f) Fondi që i takon çdo IAL dhe fakulteti mbështetur në numrin e personelit akademik të konvertuar dhe fondin për çdo 1 punonjës akademik i konvertuar ($f=c*e$).

4. Fondet e planifikuara në programin buxhetor 09770, artikulli 602, kapitulli 01 “Për kërkim fundamental dhe ekselencë”, përdoren për mbulimin e shpenzimeve, si më poshtë vijon:

a) Për blerje materiale që janë të domosdoshme vetëm për realizimin e projektit kërkimor (p.sh., blerje kimikatesh për provat eksperimentale laboratorike ose materiale të tjera të ngjashme), që financohet nga ky fond.

b) Shërbime, udhëtime e dieta që i shërbejnë drejtpërdrejt realizimit të projektit kërkimor, që financohet nga ky fond si marrje provash, kryerje matjesh, intervista/anketime në terren dhe veprimtari të tjera të ngjashme me to. Për shpenzimet e kryera nga punonjësit kur largohen jashtë qendrës së punës ose jashtë shtetit/vendit për çështje pune në bazë të kuotave të përcaktuara nga legjislacioni në fuqi.

c) Shpenzime për pjesëmarrje në konferenca, seminare, kongrese, simpoziume, shkëmbim informacioni e të tjera, të ngjashme brenda apo jashtë vendit vetëm për rastet kur

punonjësi ka një kontribut shkencor si autor i parë dhe i dytë (referate, postera) dhe kontributi është pjesë e projektit kërkimor që financohet me këtë fond.

d) Transferime korente me jashtë; kuotat e anëtarësimit që jepen për përfaqësime në organizata të ndryshme shkencore jashtë vendit, me statusin e anëtarit apo të vëzhguesit.

5. Fondet e planifikuara në programin buxhetor 09770, artikulli 230-231, kapitulli 06 “Për kërkim fundamental dhe ekselencë”, përdoren për mbulimin e shpenzimeve, si më poshtë vijon:

a) Shpenzime për rritjen e aktiveve të qëndrueshme të patrupëzuara; shpenzimet që kryhen nga ana e institucionit për krijimin ose blerjen e aktiveve të patrupëzuara për qëllime direkte të projektit kërkimor që financohet nga ky fond, shpenzimet e kryera për studime dhe përgatitje projektesh, për blerjen e patentave, të drejtën e autorit, të drejtën e mendimit intelektual, softet informatike të krijuara nga institucioni etj.

b) Shpenzime për rritjen e aktiveve të qëndrueshme të trupëzuara; për krijimin ose blerjen e aktiveve të qëndrueshme të trupëzuara që i shërbejnë drejtpërsëdrejti realizimit të projektit kërkimor që financohet nga ky fond, si: blerje pajisje dhe instrumente laboratorike, pajisje teknologjike, makineri e pajisje agrikulturore, blerje kafshë pune e prodhimi, pajisje elektronike, për krijim fondi biblioteke, blerjen dhe instalimin e rrjetit kompjuterik, të tjera të kësaj natyre.

6. Fondet e detajuara nga MASH-i për çdo institucion publik të arsimit të lartë në programin buxhetor 09770, artikulli 602, kapitulli 01 “Për kërkim fundamental dhe ekselencë”, detajohet/rishpërndahet për çdo njësi shpenzuese të institucionit, në programin buxhetor 09770, në kapitullin 01 në artikullin 602-606, shpërndahen më tej deri në nivel departamenti (shërbimi në rastin e fushës së shëndetësisë) në përputhje me kriteret e përcaktuara në pikën 3 të këtij udhëzimi. Rektorati i paraqet për miratim Këshillit të Administrimit planin e detajuar të shpërndarjes së këtij fondi deri në nivel departamenti (shërbimi në rastin e fushës së shëndetësisë).

7. Fondet e krijuara nga të ardhurat e IAL-së, sipas nenit 74 të ligjit nr.9741, datë 21.5.2007 “Për arsimin e lartë në Republikën e Shqipërisë”, të ndryshuar, të destinuara për mbështetje financiare në programin buxhetor 09770 “Fonde për kërkim fundamental dhe ekselencë”, të miratuara nga Këshilli i Administrimit detajohen nga vetë ato, sipas njësive autonome në bazë të kriterëve të pikës 3, dhe autorizohen për përdorim në programin buxhetor 09770, kapitulli 06, artikulli 230-231.

8. Buxheti i detajuar dhe i miratuar i dërgohet për zbatim dekanateve dhe këto të fundit e dërgojnë në njësitë bazë të IAL-së.

9. Përgjegjësi i njësisë bazë organizon një mbledhje të anëtarëve të njësisë në të cilën i bën të ditur anëtarëve të njësisë buxhetin e akorduar nga ky fond dhe përcakton një afat deri në 4 javë për të dorëzuar aplikimet për projekte kërkimore në bazë të grupeve kërkimore mësimore. Mbledhja mund të marrë vendim për prioritetet dhe numrin e projekteve që do të dorëzohen.

10. Projekti duhet të drejtohet nga personel akademik që zotëron së paku gradën shkencore “Doktor” dhe të ketë formën e kërkuar për projektet në kuadër të programeve kombëtare të kërkimit dhe zhvillimit, duke konsideruar edhe impaktin që ka në realizimin e tezave të masterit shkencor dhe të doktoratës. Në rastet kur në njësinë bazë të IAL-së nuk ka personel të mjaftueshëm me gradën shkencore “Doktor” dhe tituj akademikë, mund të pranohen drejtues të projekteve të jashtme, nga brenda IAL-së ose jashtë saj.

11. Projektet vlerësohen nga grupi i vlerësimit të projekteve, i cili kryesohet nga titullari i njësisë bazë dhe në të bëjnë pjesë titullarët e grupeve mësimore-kërkimore. Në rastet kur njësitë bazë nuk janë organizuar në grupe mësimore-kërkimore, titullari i njësisë bazë emëron së paku dy anëtarë të tjerë të departamentit që zotërojnë gradat dhe titujt më të lartë akademikë dhe kanë përvojë të mjaftueshme në fushën e kërkimit. Kur njësia bazë nuk ka personel të mjaftueshëm me grada dhe tituj, në grupin e vlerësimit thirren anëtarë të jashtëm të njësive të tjera, që kanë lidhje me fushën që mbulon njësia bazë në fjalë.

12. Projektet prezantohen dhe diskutohen në një mbledhje të njësisë bazë. Në përfundim

të saj, grupi i vlerësimit shpall projektet që do të financohen nga fondi për kërkim i njësisë bazë. Lista e projekteve fituese i dërgohet për dijeni dekanatit të njësisë kryesore.

13. Drejtuesit e projekteve fituese bëjnë, brenda një jave, përmirësimet e kërkuara nga grupi i vlerësimit në projekt dhe i dorëzojnë ato së bashku me një plan të hollësishëm të implementimit, si dhe atë të kostos/shpenzimeve të përgjegjësi i njësisë bazë, kancelari i njësisë kryesore dhe kancelari i IAL-së.

14. Për çdo shpenzim që kryhet në kuadër të projektit të miratuar, drejtuesi i projektit duhet të bëjë një kërkesë, të firmosur edhe nga përgjegjësi i njësisë bazë te kancelari i njësisë kryesore. Ky i fundit merr masa për realizimin e menjëhershëm të saj. Në rastet kur menaxhimi financiar është i centralizuar në nivelin e IAL-së, kancelari i njësisë kryesore e dërgon atë menjëherë te kancelari i IAL-së dhe ndjek realizimin e menjëhershëm të saj.

15. Modalitetet e tjera të zbatimit të projekteve, që mbështeten nga ky fond dhe nuk përcaktohen në këtë udhëzim, janë të njëjta me ato të projekteve kërkimore në kuadër të programeve kombëtare të kërkimit dhe zhvillimit.

16. Institucionet publike të arsimit të lartë hartojnë dhe miratojnë në organet e tyre kolegjiale raportet vjetore për përdorimin e fondeve të tyre në programin “Për kërkim fundamental dhe ekselencë”, si pjesë e raportit vjetor financiar të IAL-së.

17. Ngarkohen Sekretari i Përgjithshëm, Drejtoria e Programeve të Zhvillimit, Drejtoria e Arsimit të Lartë dhe Kërkimit Shkencor, Drejtoria e Auditit në MASH dhe institucionet publike të arsimit të lartë për zbatimin e këtij udhëzimi.

Ky udhëzim hyn në fuqi pas botimit në Fletoren Zyrtare.

MINISTRI I ARSIMIT DHE SHKENCËS
Myqerem Tafaj